

四庫全書

史部

欽定四庫全書

史部

欽定勦捕臨清逆匪紀畧卷十五  
六

詳校官監察御史<sub>臣</sub>劉芬

編修<sub>臣</sub>裴謙覆勸

總校官進士<sub>臣</sub>朱鈺

校對官編修<sub>臣</sub>朱紱

謄錄監生<sub>臣</sub>李金翅

欽定四庫全書

欽定勦捕臨清逆匪紀略卷十五

辛丑

舒赫德阿思哈楊景素奏言山東撫標中軍叅將  
海明人雖謹慎而才識短淺不能振作有為難勝  
外省營伍之任應請補用旗員以免貽誤其所遺  
撫標中軍叅將員缺查有新補德州營叅將武靈  
阿由健銳營委署前鋒叅將歷陞直隸督標遊擊

因在臨清西岸殺賊有功遵

旨奏補今職該員明敏勇幹訓練有方應請調補撫標  
中軍叅將所遺德州營叅將員缺查有萊州營叅  
將馬文俊老練曉事熟習營伍此次帶兵勦賊亦  
屬奮勉以之調補德州營叅將實與衝途營伍有  
益所遺萊州營叅將員缺查有直隸秦寧鎮遊擊  
剛塔因此次打仗出力奉

旨留於東省遇有相當缺出即行酌量補用該員勤勇

幹練辦事實心今請以遊擊借萊州營叅將亦屬  
人地相宜奏入得

旨如所請行

同日又奏言逆匪王倫等擾害壽張陽穀堂邑三  
縣倉庫銀穀恐被搶劫先經前撫臣徐績飭委該  
道府等逐一清查據稟壽張縣庫銀約少八百兩  
陽穀縣庫銀少二百兩倉穀未經搶劫堂邑縣倉  
庫並無缺少隨經徐績等據稟具奏嗣後委署壽

張縣事兗州府經歷鄭飛鳴稟稱逐欸查核實少  
庫銀三千四百九十五兩零又據陽穀縣知縣張  
克紳稟稱當時倉猝檢點未及細查嗣於貯銀櫃  
底檢出元寶四錠適符二百兩之數並無虧缺臣  
等以前後稟報數目不符恐有查報不實及該縣  
官吏乘機侵沒情弊必須徹底清查當經委員試  
用知縣曹宅安長清縣知縣高怡分往壽張堂邑  
陽穀三縣逐細盤量除陽穀堂邑二縣按冊確查

并存倉穀石逐處丈量並無缺少外壽張縣實少  
庫銀三千四百九十五兩八錢并少倉穀三千一  
百一十石三斗查係該道府於逆匪甫離壽張後  
即往查看未及逐項細核止照貯庫銀數查報共  
少兵餉穀價稅契等項八百六十八兩約略具報  
少銀八百兩迨後鄭飛鳴於九月初七日到任逐  
一細查庫貯之外尚有徵收在櫃本年地丁正耗  
一千九百二十六兩零尚未拆封又應解河道項

下銀五百三十四兩零前任沈令正在支出傾鎔收存在署又本年課程銀一百六十兩四錢徵收錢文尚未易銀亦一併劫去實在共少銀三千四百九十五兩八錢再壽張縣倉穀原分四廠存貯逆匪在城盤踞三日扒搶倉糧以資日食並用車裝運臨清等處實在被搶劫倉穀三千一百一十石三斗現在盤量屬實並據布政使國泰查稟數目相符臣等伏思庫銀倉穀最關緊要該道府奉



委清查雖在逆匪肆擾之時但不能詳悉查明率  
行稟報前撫臣徐績亦即據稟上

聞均難辭咎所有壽張縣被劫庫銀三千四百九十五  
兩八錢又被搶倉穀三千一百一十石三斗按照  
定例每石八錢計算該銀二千四百八十八兩二  
錢四分共銀五千九百八十四兩四分相應奏明  
請

旨著落前撫臣徐績布政使國泰兗沂曹道松齡兗州

府知府福森布分股攤賠以清欸項其原任知縣  
沈齊義業經被害身故該署縣知縣鄭飛鳴到任  
後即行查稟並未隨同率報應請免令分賠奏入  
報

聞

同日又奏言臨清州被賊擾害之處仰沐

聖主特沛

恩綸既蠲緩其正賦復撫恤其身家似此逾格加

恩靡不感深淪浹臣等遵即督辦派委各官查明房屋  
被燒及應賑口糧之戶一面給與賑票令其持票  
領賑一面立定底冊以便道府稽查今天氣已寒  
先將房屋修費散給即於十月十八日動支倉穀  
先給一月口糧城鄉分廠臣等親赴監視百姓擔  
囊負索領賑而歸均各欣欣色喜臣等諭以爾等  
俱係良民是以

皇上加恩撫恤爾等益宜感激

天恩此後更當安分守法永享太平百姓人等亦俱口稱

皇恩浩蕩感戴不忘臣等核計臨清州舊城內及被害鄉莊戶口遵

旨加賑四個月約計需穀二萬七千三百餘石撫恤燒房之戶約計需銀二千三百餘兩目下先給一月口糧其餘俟十一月十二月正月按月接續散給又查壽張堂邑陽穀三縣被賊擾害雖較臨清尚

輕蒙

聖恩緩徵本年錢糧漕米百姓已屬沾

恩但細加體訪該三邑賊匪屯聚經由之處誠如

聖諭或有人被賊戕屋被賊燒凡米穀牛騾被賊搶掠

之家實與臨清舊城被害居民無異臣等仰體

皇仁亦令印委各官查明三邑燒房之戶給與每戶一

兩五錢修費約共需銀八百餘兩其被害戶口給

與四個月口糧約共需穀四千七百餘石現亦動

支銀穀按月散給小民愈慶安全奏入

諭部知之

癸卯

舒赫德阿思哈楊景素奏言臣等查壽張賊匪王倫等以邪教煽惑愚民夜聚晝散形蹤漸露該縣知縣沈齊義知信查拏賊衆遂謀先發於八月二十八日夜賊衆潛入城中各舉火把齊入縣署知縣沈齊義出救甫至二堂賊已擁入沈齊義見其

執持刀械高聲喊罵被賊執縛兩手逼其降順沈  
齊義罵愈厲遂遭亂砍斃命署壽張營遊擊趕福  
因賊至無兵欲出城追捕致被賊殺死南門內時  
有莘縣把總楊兆立經兗州鎮調赴陽穀守城與  
賊接仗被賊殺害陽穀縣丞劉希燾駐劄阿城聞  
知賊犯縣城即帶役馳赴救援行至東門外柴家  
莊遇賊被害典史方光祀聞賊入城即同胞姪方  
義趨赴監獄防護賊匪打破監門方光祀叔姪俱

被殺監門初四日賊至堂邑署堂邑縣知縣陳枚  
同伊胞弟壬申科武舉陳元樑把總楊兆相訓導  
吳琛分守四門賊衆突至城下城中僅有汛兵二  
十七名不能抵禦被賊衝入南門楊兆相即於門  
內戰死頭腦俱裂陳枚與胞弟陳元樑同守北門  
被賊拘執逼伊兄弟順從陳枚陳元樑罵賊不屈  
俱被賊砍斷四肢而死訓導吳琛分守西門被賊  
迫脅即與胞姪吳文秀家人王忠同聲罵賊主僕



三人均遭慘殺以上文武各員弁及家屬人等俱  
經道府飭令地方官備棺盛殮除署遊擊趕福知  
縣沈齊義陳枚訓導吳琛四員已蒙

恩旨准照陣亡例議卹所有陽穀縣縣丞劉希燾陽穀  
縣典史方光祀堂邑縣知縣陳枚之胞弟武舉陳  
元樑莘縣把總楊兆立堂邑汛把總楊兆相等可  
否仰邀

恩卹至方光祀之姪方義吳琛之姪吳文秀以無職之

人俱能隨同伊叔抗賊被害情亦可憫應請照兵  
丁之例一併交部議卹家人王忠量加賞給銀兩  
奏入

上諭內閣曰據舒赫德等查奏逆匪劫擾陽穀縣尚有  
陽穀縣縣丞劉希燾典史方光祀堂邑縣知縣陳枚  
之胞弟武舉陳元傑莘縣把總楊兆立堂邑縣把總  
楊兆相俱因保護城池監獄被賊殺害並有典史方  
光祀之姪方義訓導吳璫之姪吳文秀及家人王忠

俱隨同抗賊被害等語縣丞劉希燾典史方光祀武  
舉陳元樑把總楊兆立楊兆相或因守土被戕或因  
罵賊遇害均為克全臣節著交部照陣亡例議卹至  
方義吳文秀以無職之人能以身殉實為明曉大義  
著交部照陣亡兵丁例一體議卹其家人王忠隨主  
罵賊不屈亦遭慘殺情殊可憫並著該撫查其家口  
量賞銀兩以示優卹

同日又奏言竊照壽張縣逆匪王倫等以邪教聚

衆潛謀不軌該省文武員弁既不能察緝於前又不能撲滅於後以致上座

廟算調遣勁旅隨經即日剷除而該地方官平日漫無防閑守禦遂使賊匪蔓延焚燒攻掠自當一律嚴叅用昭懲儆臣等伏查例載腹裏州縣與武職官同住一城若守備不設被賊攻陷城池劫殺焚燒者武職官比照守邊將帥失陷城寨律擬斬監候其府州縣掌印并捕盜官俱比照守邊將帥被賊

人侵入境內擄掠民人律發邊遠充軍其守巡道  
官交部分別議處提問等因今此案應叅文職各  
員除壽張縣知縣沈濟義陽穀縣縣丞劉希燾典  
史方光祀署堂邑縣知縣陳枚均已被賊殺害外  
所有陽穀縣知縣張克紳壽張縣典史朱子雲堂  
邑縣典史楊瑄均屬地方印捕專員罪無可逭至  
管轄壽張陽穀二縣之兗沂曹道松齡兗州府知  
府兼攝同知福森布管轄堂邑縣之濟東秦武道

宋文錦前任東昌府知府胡德琳現任東昌府知府季世法暨同知鍾翔鳳雖與各該縣不係同城但身為掌印捕盜等官平時不能率屬員查察奸民以致賊匪入境肆擾例應提問至藩臬兩司為通省大吏不能率屬嚴加查察致逆匪擾害各邑所有山東布政使國泰按察使孫廷槐亦應一併開叅其應叅武職各官除兗州鎮總兵惟一業經正法臨清協副將葉信亦經革職拏問旋即病



上緊緝捕逸匪抑或即行革職提問之處伏候

諭旨遵行再查兗州府同知馬遇因入闈監試堂邑縣  
知縣湯桂因委署清平縣事又入闈公出均未回  
任堂邑縣典史楊瑄因押解人犯吳洪等赴東昌  
府並未在城合併奏明奏入

上諭內閣曰陽穀縣知縣張克紳壽張縣典史朱子雲  
堂邑縣典史楊瑄兗沂曹道松齡兗州府知府兼攝  
同知福森布濟東秦武道宋文錦前任東昌府知府



胡德琳現任知府季世法同知鍾翔鳳山東布政使  
國泰按察使孫廷槐壽張縣把總孫雲龍陽穀汛把  
總夏克信蕙轄守備王廷佐陳高曹縣營叅將尚維  
寶俱著交部分別議處至前任巡撫徐績業已解任  
令其緝捕逆匪統俟緝捕事竣視其出力與否再降  
諭旨

同日舒赫德阿思哈楊景素奏言查究沂曹道松  
齡濟東泰武道宋文錦東昌府知府季世法兗州

府知府福森布平時不能率屬察奸以致賊匪肆  
擾現經臣等另摺叅

奏例應離任候

旨所遺各缺正值辦理善後事宜之際甚關緊要伏查  
前奉

諭旨忠德赫紳秦章棠敷倫泰俱發交山東巡撫楊景  
素差委遇有緊要道府缺出即酌量補用臣等公同  
酌議人地相宜請即以忠德補授兗沂曹道章棠

補授濟東秦武道赫紳秦補授東昌府知府敷倫  
秦補授兗州府知府令于一切善後事宜實心實  
力率屬妥協辦理以裨地方奏入得

旨如所請行

同日又奏言臣等奉

諭旨據王樸供王倫之師張既成雖已身死至張既成  
之師袁公溥必須查拏嚴審等因隨據東平州知州  
白雲從等查明袁公溥係東平所丁家屯八已於

本年六月病故其墳墓即在丁家屯袁公溥有三子長子袁世法已死有妻王氏子袁懷禮次子袁世則本年八月出外並無妻室三子袁世珍與姪袁懷禮賣菜度日有妻李氏女令姐臣等隨提袁世珍到案訊問據供袁公溥是我父親平日行醫原會推挈常出外與人治病今年八十六歲於六月內患病身故平日聽得父親說有三個徒弟一個國治益一個國瑞已死一個王百臣俱陽穀縣

人父親傳過他們治病方子並未聽見說有徒弟  
張既成至王百臣有徒弟王心實亦係陽穀縣人  
父親在日看病傳方是有的並不知有邪教等語  
袁懷禮供亦相同臣等復提國治孟王百臣到案  
訊供俱稱曾向袁公溥要過治眼方及學推拿之  
法因他是行醫的人所以都稱他袁師傅其實並  
未拜他為師亦不知他有邪教情事又訊據王心  
實供我認得王百臣傳授藥方也曾見過袁公溥

至張既成從未認識等供查王倫邪教係張既成所傳而張既成又係袁公溥逸授此語出之王樸所供自為有據今袁公溥已經身死袁世珍等自不肯將伊父曾收張既成為徒弟一節應認即國治孟王百臣王心實亦以指証無人未能質實應將袁世珍袁懷禮國治孟王百臣王心實一併解京與王樸質對其袁公溥之墳墓臣楊景素已派員前往掘毀又據陽穀縣拏獲張既成妻弟張克

印到案訊據供稱係陽穀縣人年六十歲有姊姊  
嫁與張既成為妻已死多年外甥張小柱久經逃  
出張既成木匠為生時常替王倫蓋房子並不知  
道是他師傅我從未跟他學道那有到別處行道  
的事等語查張克印現在行道之語亦係王樸所  
供臣等將該犯一併解京質對奏入報

聞

同日又奏言據張秋守備王廷佐拏獲王維全一

犯又清平縣巡檢林作棍拏獲李國泰一犯各解  
送前來臣等將該犯等嚴訊據王維全供我是壽  
張縣人有房二十四間在縣前開錢鋪素日認識  
閻吉祥閻吉仁劉煥勾引入道就拜閻吉祥為師  
見過王倫我家有劍一口轉託閻吉祥獻于王倫  
七月間我到了王倫家還有李士傑閻吉祥閻吉  
瑞等數人在彼商同要到壽張殺官劫庫至八月  
二十八日我同劉煥開南門迎接衆人入城殺過



兩個百姓又因與族兄王任有仇並殺了王任及他兒媳王倫進城住在小的房子裏封做國公初二日小的家眷跟著衆人上臨清王倫叫保護著走並未出去打仗官兵到後于二十六日逃出到張秋鎮被獲臣等復將前在王倫屍旁起出之劍令其識認據供即係所獻之物又訊據季國泰供我係臨清車營街人與季國貞是叔伯兄弟平日與張善良認識賊到臨清逼令入夥叫把家眷搬

到賊營王經隆給與小紅旗管辦車輛又辦了三  
十餘根杉木扎爬城軟梯小的是個頭目十二日  
領了三百多兵把過北口子二十三日官兵到來  
從北門逃走在德平被獲等供查王維全獻劍開  
城受賊偽官季國泰扎梯把口為賊頭目均應解  
京備訊奏入報

聞

同日又奏言昨奉

諭旨河南獲犯供出和尚廣標迫脅孫敬入夥應拏獲  
解京等因臣等於現獲各犯內查出廣標一名訊據  
供稱本姓劉十四歲在本籍曹州府荷澤縣烏靈  
寺出家後又還俗過繼與堂伯劉名山為子十六  
歲逃荒到壽張在南臺廟又做和尚師父已經死  
了有梵偉和尚叫我入教到八月二十八日事起  
先叫我們在廟等候至二十九日天明纔同慧占  
慧泉廣仲進壽張縣城梵偉派令把守南門又叫

看守當舖並未殺人後起身到陽穀堂邑一路焚  
偉叫我在後面護送車輛到了臨清曾跟去用火  
藥攻過南門至二十四日官兵殺散衆人我躲避  
被獲等語合將該犯一併解京其慧占慧泉廣仲  
三犯據供俱經官兵焚殺已死合併奏明奏入報

聞

同日又奏言臣等遵

旨查壽張營守備王廷佐原係駐防張秋八月二十八

日實係在荆門關催趲漕船至千總孫雲龍當賊  
匪進城時即帶兵赴遊擊衙門接應遊擊趕福已  
經出署該千總曾與賊打仗後見西庫軍器房火  
起賊衆難敵即殺出西門赴范縣求救聞知趕福  
已在張秋即行趕赴是時兗州鎮臣惟一亦領兵  
前至張秋初三日于四座棚地方拏賊五名惟一  
即交孫雲龍送至東昌審問是千總孫雲龍當賊  
至之日曾赴趕福衙門接應以賊匪衆多赴范縣

求救後經奉差押犯前往東昌尚無畏賊逃避情  
弊奏入報

聞

同日又奏言臣舒赫德於逆案辦竣後即與臣楊  
景素帶同總兵瑪爾清阿前往壽張查辦趕福叫  
喚不到之兵并就近于堂邑陽穀一帶察看情形  
撫綏民衆仍由東昌回德州查辦逃兵事畢臣舒  
赫德起程回京臣阿思哈于臣舒赫德等往壽張



聞

同日舒赫德奏言臣前奉

諭旨令于赴德州時查辦潰逃之駐防兵分別嚴拏重  
究臣等業經分咨直隸山東河南三省嚴拏並嚴飭  
德州知州在就近德州一帶查訪加緊躡緝在案  
伏查格圖肯前于九月十二日與賊打仗時共帶  
滿兵二百五十名潰散後查點計少五十九名直  
至九月二十七八九等日勦賊大局定後始差人



前往原打仗處所尋覓共獲屍骸四十三具面目  
尚可認識及有記號可辨又在直隸故城縣拏獲  
新城一犯經臣

奏明正法此外尚有十五名不知下落臣現擬由壽  
張一帶查辦事件前赴德州到彼時如有已經拏  
獲者即訊明正法如未拏獲臣即嚴催直隸河南  
山東務期上緊嚴緝于拏獲處訊明一面正法一  
面奏

聞庶軍法嚴肅各省駐防皆聞而知倣奏入報

聞

丙午

上諭內閣曰徐績在山東巡撫任內因逆匪王倫等滋擾一案辦理未能妥協特將伊解任令其緝捕逸犯勉圖自効並據舒赫德奏逆犯孟燦供詞有因地方災歟官吏額外加徵釀成事釁之語若所供果確卽應將徐績重治其罪因諭令舒赫德楊景素等密訪

嚴查嗣後舒赫德查奏壽張年歲有收該縣亦無橫徵加派之事今日並據楊景素奏東省秋成通計八分有餘其非匿災可知是徐績之咎祇在失察邪教尚非大過念其平日辦事頗能黽勉河南巡撫何燏現在病故其遺缺著加恩即令徐績補授並管提督仍革職留任俟八年無過方准開復所有從前賞給孔雀翎不准戴用以示懲儆足矣河南巡撫員缺緊要徐績即速前往接辦其未到任之前巡撫印務著

榮柱暫行護理

臣等謹按撫臣徐績於東省逆匪一案既未能先事稽察早杜亂萌復未能臨時妥辦致滋擾害

皇上念其平日頗克奮勉爰

命解任緝犯以贖前愆繼復密經訪查並無歲歉匿災額外橫征之事核其功過尚足相當因河南巡撫缺出一時難得其人



加恩降補知縣仍留山東交與楊景素差委酌量補用

同日舒赫德阿思哈楊景素奏言據各州縣陸續解到獲匪經臣等派令司道等隨時研鞫查有李成一犯係入道隨賊在堂邑助逆劫獄之犯情罪重大應凌遲處死其彭得正等六十四名或攻城守口或打仗殺人或下鄉搶掠或從賊日久均屬黨惡法無可貸應即行斬決內有王銀一犯係壽

張營兵于正法後仍傳首本營俾綠旗兵丁共知  
炯戒又王五等八十五名雖係脅從均經為賊役  
使未便輕縱應發極邊烟瘴充軍至趙榮等四百  
七十五名俱係被擄未久旋即逃出并老幼殘廢  
為賊迫脅情有可原相應釋放再應行緣坐人犯  
臣等於陸續獲犯中訊得趙默係趙大坊之父李  
孟朗係李國貞之父孫命係孫山胞弟李雲係李  
忠之祖閻宗泗係閻吉仁胞叔唐汝明係唐洪禮

之父唐洪義係唐洪禮胞兄江二係江三胞兄李  
接如係李士傑之父以上九犯俱係有名賊目之  
父兄子弟應照緣坐例擬斬立決又李王氏等婦  
女幼孩二十八口俱係逆犯眷屬應照例賞給功  
臣之家為奴奏入報

聞

同日又奏言前奉

諭旨據梵偉供伊所與王倫銀鐺係壽張當夥王登雲



給與亦入教隨往臨清其人曾否就獲並著楊景素  
即速查拏解京審訊臣等現于獲犯中訊得王得潤  
即王登雲供我是山西汾陽縣人自乾隆二十年  
就到壽張馬周訓恒盛當舖掌櫃八月二十八日  
賊人將壽張城佔住二十九日清早就把我當舖  
搶了併持刀逼令順從賊帥梵偉即將當內衣服  
散給賊衆曾搶去銀鐲一副九月初三日賊人迫  
脅同行跟至臨清一路為賊人喂馬並未打仗乘

空逃出被獲所有銀鐺二個是梵偉搶去並非我  
獻給等語查王得潤由壽張從賊至臨清且據供  
銀鐺係梵偉搶去安知非王得潤自行獻給一經  
梵偉質証自無從狡飾所有王得潤一犯應俟健  
銳營官兵起程之日交令解京奏入報

聞

同日又奏言查逆匪案內人犯經官兵勦殺擒拏  
及陸續就獲分別辦理者醜類殆盡除嚴拏歸太

劉煥二犯外如冀盤佑李忠等數犯亦係情罪重大應上緊躡捕至其餘零星賊匪畏罪潛逃方躲匿不暇自不能別生事釁今臣楊景素分派十路嚴查村落小民未免惶惑兼恐日久不肖胥役潛啟挾嫌誣害之弊且督等愈緊竄跡愈深真賊轉未能即得臣等酌量現在情形緝匪一事此時似宜稍緩惟在臣楊景素時刻留心不懈自能漸就弋獲臣等詳商莫若將所派各路員弁捕役人等

暫行撤回庶奸匪知查禁漸寬自必潛回故里臣  
楊景素當飭屬暗中訪緝或密諭鄉民隨時擒獻  
似于緝拏逸匪一節轉為有益臣等謹就現在情  
形據實奏聞奏入得

旨應如此辦理

同日楊景素奏言查教職一官專司訓飭士子平  
日不能實心化導以致身列青衿之人從賊偷生  
該教官實難辭咎先經臣因臨清州武生吳兆隆

等審有從賊情事業將該管學正孟毓燦訓導李世璐暨學臣李中簡具摺叅

奏在案迨後提犯嚴訊又經究出臨清州武生邢成德供認隨同賊衆在浮橋把守生員從賊情罪較重除將該犯解京備訊外所有失察之教官亦係臨清州學正孟毓叅訓導李世璐相應據實叅請交部嚴加議處至前任山東學政李中簡亦應一併附叅奏入得

旨該部議奏

丁未

舒赫德阿思哈楊景素奏言臣等將周曰璜控告  
謀反之伊子周振東及單開同謀王君弼等犯並  
周曰璜之母妻等全行拘獲到案研訊王君弼等  
皆極口稱寃並各訴周曰璜平素好賭不安本分  
債負纍纍其母令伊孫周振東掌管家計是以父  
子不睦等語隨提訊周振東據供幼時曾與王君

弼等學拳為防身之用並無不法情事伊父所供毫無影響加以刑訊矢口不移質之周曰璜之母妻等供亦相同臣等因思周振東係周曰璜親子即有家庭不睦之事亦何忍遽置其子于極刑死地若因索債急迫與開單各犯有仇藉此傾害亦何必陷其子以誣衆人反覆思維總無情理嗣將周曰璜之媳馬氏拘提密問始據供稱伊翁曾因其子外出調戲逼姦後被周振東撞遇從此即與

父不和并欲令其妻自盡等語周曰璜經質証之餘不能遁飾始稱我因兒子欲令媳婦尋死所以起意首告謀反至媳婦並不知我有出首之事臣等查周曰璜因與媳通姦為子周振東撞見有逼令馬氏自死之語心懷怨恨輒以謀反重情誣控伊子牽涉多人淫惡殘忍實非人類周曰璜誣告叛逆未決罪止斬候今審明調姦伊媳有關倫紀應照律擬斬立決馬氏訊無同謀出首情事而翁



媳通姦業已自認不諱應一併擬斬立決再查周  
曰璜所首謀反名單審屬全虛惟周振東前經供  
認學拳并審得王君弼王浩常富貴俱平時學習  
拳棒遊手好閒應將周振東王君弼王浩常富貴  
照例杖一百流三千里其餘單內所開之朱太和  
等審屬無干概行省釋奏入得

旨著依議行

臣等謹按東省奸民大經懲創自宜共知儆懼

乃周曰璜復以結謀不軌控告其子實為事理所無

皇上洞燭情偽意其或有他故

諭舒赫德等悉心嚴鞠果得實情爰書既定使敗倫者立正刑誅而拳勇者俱從竄徙不致累及無辜里巷小民從茲守分安良倍知自好而奸頑餘習豈尚虞滌祓之未盡歟

同日

上命軍機大臣傳諭舒赫德楊景素曰今日訊問解到各犯據季國泰供稱擡杉槁扎軟梯係堂邑韓家莊人韓增指使又據梵偉供在臨清時尚有于瑞派他把守天橋口該犯係壽張南門內人又在塔灣打仗時尚有王亮李忠一同領兵王亮係林家壩人李忠係壽張井家莊人等語著舒赫德楊景素即將韓增于瑞王亮李忠四犯速即查獲嚴辦並將李忠是否即係前日查拏之賊帥李仲查明覆奏

戊申

舒赫德阿思哈楊景素奏言前據徐績等獲賊犯  
任貴松等九名又據各州縣拏獲趙士秀等十三  
名臣等逐一研訊審得任貴松任貴江趙士秀趙  
士英郭青山李順王振江七犯為賊打仗守口法  
無可貸均應斬決韓有為孫六閻桐歐七趙光耀  
張九傳雖係被逼入夥而為賊喂馬挑草派守浮  
橋亦難輕縱應發極邊烟瘴充軍又王倫義兒艾

得見之母賈氏妻郭氏子三妮二小温炳之媳馬氏趙大坊之祖母張氏及從逆壽張縣書辦冀盤佑之母王氏妹讓姐女香姐均係逆犯親屬應照例緣坐給功臣之家為奴奏入報

聞

同日又奏言前據漕運總督嘉謨將拏獲逆匪趙元馬存仁馬李氏滕山陳湘五犯陸續押解前來內查趙元一犯前奉

諭旨據嘉謨奏盤獲趙元一犯供稱王倫第十八義兒年十七歲由趙傳引進訊之現在各犯俱稱趙傳係王倫乾兒並不知有趙元即詰之王樸亦稱實無其人等因臣等即提趙元研訊據供是壽張縣人八月二十九日趙玉佩領衆來家逼令跟進壽張城一路趕車喂馬後來到了臨清又與他做飯九月二十三日官兵到了我潛行出來與同縣馬存仁俱被衙役拏獲我並不是王倫義兒從前實係畏刑

妄供復提馬存仁質証據供是壽張人被趙傳裏  
去做飯逃出時遇著趙元俱被拏住我知道趙元  
哥子趙傳是王倫義兒所以妄供等語是趙元之  
非王倫義兒已無疑義但該犯曾入教運氣實屬  
賊黨應即正法其馬存仁一犯既為趙傳供役亦  
難輕宥應發極邊烟瘴充軍至馬存仁之母李氏  
係趙傳裏至臨清又滕山陳湘二犯雖曾為賊打  
水拉車俱于官兵未到之前先行逃出相應釋放

奏入報

聞

己酉

嘉謨奏言臣屢奉

諭旨沿河一帶嚴查各幫船內有逃匪混充短絳水手者即拏獲具奏臣于十月十三日行至東平州途次接湖南二幫千總劉邦直稟稱在安山地方盤獲將二一犯據稱臨清州人被賊匪拏住逼令順從



看守車輛給藍布包頭又與丸藥吃並未打仗後  
逃出南水關到安山被獲臣親提研訊無異又于  
十月十七日據差委催船目兵郭露稟稱在濟寧  
州地方盤獲沈文魁一犯據稱博平縣人到臨清  
遇見賊匪搶去騾頭逼令跟隨代馱麩豆乘空逃  
出到濟寧被獲臣即發交濟寧州嚴訊據供前情  
不諱以上二犯俱轉解東昌府嚴行監禁伏查逃  
竄賊黨雖各處潛踪近日因沿河要隘閘口等處

盤查嚴緊是以充催短絳者甚少今尾幫糧船于  
十月二十日催過濟寧已入下水凡各幫船原催  
水手足數撐駕無庸添絳臣晝夜催令趲行仍沿  
路嚴查不使稍有混漏所有現獲之蔣二沈文魁  
二犯請即交楊景素彙案辦理奏入報

聞

十一月壬子

上諭內閣曰大學士舒赫德辦理山東逆匪王倫一案

迅速勦除安輯良善經理諸務俱能盡竭心力動合  
機宜深可嘉尚舒赫德著加恩授為御前大臣賞戴  
雙眼孔雀翎其從前所得雲騎尉世職仍著賞給

癸丑

舒赫德楊景素奏言原奉

諭旨查趕福從署後走出喊叫兵丁拏賊並無人應一  
節臣等即飛飭克州鎮總兵瑪爾清阿提取壽張營  
各兵丁值日號簿按名嚴查旋據該鎮造冊呈報

本年八月二十八日夜在遊擊衙署上宿兵二十七名內除沖散未回四名受傷三名現存二十名在城內巡街坐卡兵四十三名內除逃避五名陣亡二名從賊被獲正法二名現存兵三十五名當經臣等扎飭壽張縣會同該營逐一拘齊分別嚴押候訊臣等于十月二十九日行抵壽張即親提各兵逐加嚴鞫審得上宿兵內聶新曹大李文魁葛大本曹養成岳淇六名俱係一聞賊至即向內

我尋趕福同出後墻隨往陽穀又朱占魁一名係  
尋見趕福令其復行回署取印趕赴陽穀續俱同  
至張秋臣等質之張秋守備王廷佐亦稱趕福到  
張秋日實有此七人隨來是聶新等尚無見賊畏  
避不顧本官之事應請免其治罪又賈申王萬珠  
二名在趕福署前跟隨千總孫雲龍打仗隨出西  
門同往陽穀又許士魁劉永清丁永亮王明亦在  
署前跟隨外委韓永忠打仗隨出東門同往張秋

其董樂天一名找尋趕福適遇朱占魁回署取印  
即同赴陽穀以上七名雖在署前隨千總外委打  
仗同赴陽穀張秋等處但究未緊護趕福亦屬不  
合應革去名糧枷杖示衆其餘谷相成張文彪甯  
振魁王居忠寇顯成劉堪既未緊護本官又未跟  
同千總等打仗實係一聞賊至畏避四散相應請  
將谷相成等六犯發往伊犁分給兵丁為奴其在  
城巡卡兵內崔重一名見賊人衆多且聞趕福已

走即往張秋守備處送信求救尚非逃避應免責  
革外其趙萬清等三十四名俱應革去名糧嚴行  
重責并令隨行將弁帶領各營兵丁四面環觀俾  
綠營知所懲儆至壽張從賊兵丁前經審有姜捷  
王銀二犯業經請

旨正法傳首本營至陣亡及沖散未回各兵臣楊景素  
另行嚴辦不敢輕縱奏入報

聞

同日又奏言臣等自臨清起程見廢城地面經劫掠之餘殘毀自所不免然現在歸來戶口不下數萬賑糧已放一月臣等經過之時夾道迎迓無不

感頌

聖恩其堂邑陽穀壽張等縣鄉落村民亦俱歡迎道左頗有飽暖安居之樂臣楊景素并宣布

皇仁諭以無惑奸邪各安良善即學習拳棒亦非本分所宜有犯必懲毋貽後悔百姓咸叩頭感謝所有



堂邑陽穀壽張三縣應賑口糧及給領房價臣楊景素亦已飭屬妥辦隨地撫綏現在民情寧貼奏入報

聞

同日又奏言臣等接奉

諭旨查拏韓增于瑞王亮李忠等四犯查已決賊犯冊內有于瑞王亮二犯于瑞係壽張人隨賊到臨清打仗與梵偉所供之壽張人于瑞相符王亮係從

陽穀跟賊搶過當舖梵偉所供王亮係林家壩人  
林家壩查係陽穀縣地方亦屬脗合是此二犯俱  
經拏獲正法李忠一犯曾為賊帥在油坊帶人打  
仗經臣等派員拏伊祖李雲及伊母妹等照緣坐  
例辦理其本犯尚未就獲現在嚴行查緝至韓增  
一犯查歷次審辦賊犯內並無其人既經李國泰  
供出伊有指使扎縛軟梯之事自屬案內要犯臣  
楊景素當即派委員弁與前此嚴緝之李忠一併

緝拏務獲奏入

諭曰此等要犯不可作通緝觀須一月一奏其就獲與否

同日舒赫德奏言查山東河南邪教一事雖不敢顯稱白蓮教而清水教無為教等名色其實則一總以避劫之語煽惑愚民故從教者動至千百人州縣官拏獲過急則激變一時而庸懦無識之員又以相沿既久狃于目前遂致日就滋蔓今當王

倫一案大加懲創之餘人心知畏所有河南邪教  
正可乘機辦理惟在徐績榮柱等不動聲色密訪  
嚴禁並當飭令州縣出示開諭曉以利害訓其改  
過自新倘仍怙惡不悛擇其為首之人嚴行懲治  
自必漸次可除督撫藩臬等果能時刻留心辦理  
亦屬易事臣已遵

旨令徐績速赴新任今于初一日在東昌府相晤即面  
囑其到豫後妥密辦理謹繕摺覆奏奏入報

聞

同日暫護河南巡撫印務按察使榮柱奏言臣遵奉

諭旨將逆犯張百祿解京於十月二十六日委員押解起程至張百祿前次供出之張成章等俱已拏獲解省等因具奏奏入

上命軍機大臣傳諭直隸山東河南山西江蘇安徽湖北湖南各省督撫曰據榮柱奏拏獲山東逆犯張百

祿于十月二十六日派員押解赴京等語張百祿係  
逆首王倫義兒且往遂平糾衆入教實為此案要犯  
該省起解殊屬遲延至此案內有賊黨歸太即國太  
為賊宣行來京探訪信息搶劫糧船搭橋到處打仗  
殺人情罪實為重大必當上緊緝拏不可令其久稽  
顯戮又劉煥係壽張縣壯役冀盤佑係壽張縣倉書  
俱開城迎賊擡出本官脅逼降賊又溫炳趙傳係王  
倫義兒均屬重罪要犯節經諭令山東等省查拏至

今未報弋獲此等人犯自揣罪惡深重或潛匿相近之直隸河南等處均未可知著再傳諭周元理楊景素徐績嚴飭各屬上緊緝解京嚴辦不得視為具文以致該犯等免脫遠颺並著每月將各該犯曾否獲到之處奏報一次至江蘇安徽湖北湖南山西等省亦係毗連豫東兩省境地並恐該犯等改裝匿跡潛竄境內並著諭令各該督撫等一體留心訪拏務獲雖不必如山東等省之按月奏報亦當實力飭拏

勿稍疎懈並不得視為海捕故套致要犯得稽顯戮

乙卯

楊景素奏言臣于十月二十七日同大學士舒赫德自臨清起程茲于本月初四日行抵德州所有查辦德州駐防逃兵業經大學士舒赫德另摺具奏其在逃各兵臣仍飭各屬嚴拏務獲大學士舒赫德即于初五日自德州起身回京臣亦是日啟行仍回臨清料理事件逐一清釐即遵



旨赴省城辦事查臨清堂邑陽穀壽張等州縣十月分  
應賑口糧早經按戶給放尚無遺濫被難貧民均  
沾實惠其十一月分應放賑米臣又面飭各委員  
悉心經理並令布政使國泰暫留督辦俟監放十  
一月賑米之後亦即飭令回省料理兩月以來積  
案仍令兗沂曹道忠德泰安府知府朱孝純留駐  
臨清暫行彈壓稽查至緝捕逸匪一節如歸太劉  
煥冀盤佑李忠等要犯臣已懸立重賞慎選文武

員弁分撥幹捕到處尋蹤密緝即其餘各犯現雖暫緩兵役分拏臣仍諭令州縣官留心偵捕勿以通緝具文了事大學士舒赫德現已回京所有緝匪撫綏諸務皆臣專責自當實心實力以期經理得宜無負

聖明委任之意奏入報

聞

同日舒赫德奏言臣遵

旨查辦德州潰逃駐防滿兵一事茲于十一月初四日  
行抵德州面見城守尉福保即詢明在逃各兵曾  
否就獲據稱有委署領催塔爾布押甲和爾敦布  
和清保于十月初七八九日在塔兒灣我著各人  
哥子譚存英住福昌保骨殖三具各燒化帶回此  
外尚無下落等語臣即將塔爾布等當面詰詢俱  
稱實係認准故敢將骨殖燒化帶回萬一將來譚  
存等于別處被獲塔爾布等願受死罪臣復詰問

有何憑據該兵丁俱將實據指出是譚存等三名  
身死屬實除行文停緝外其餘十二名現在雖無  
踪跡諒其竄匿不遠四路嚴緝自可就獲臣現又  
飛咨直隸河南山東各督撫囑令嚴飭所屬上緊  
查拏如獲有此項逃兵即照臣前奏訊明該犯確  
供一面正法一面奏

聞並將該兵檔內削去旗籍逐出妻子臣并面諭城守  
尉福保及德州知州李燕就近偵訪如有竄歸本

處者立即跟拏辦理自不致日久稽誅臣于遵

旨交查事件現俱辦竣今定于初五日自德州起程回

京復

命奏入

上諭內閣曰大學士舒赫德奏查辦德州潰逃駐防滿  
兵一事內譚存英住福昌保三名經其家屬尋覓屍  
骸焚化帶回其餘十二名已飛咨直隸河南山東各  
督撫上緊查拏並將該兵削去旗籍逐出妻子等語

朕之令如此嚴辦者以臨陣退縮已失滿洲正道而又逃去無踪故並斥逐其妻子以示彼自外于滿洲也今既有認係死于亂軍則現在未獲之十二名其中或亦有因傷身歿者亦未可知若因現無踪影即將其妻子遽行驅逐出旗未免可憫駐防兵丁住居外省日久于本地語音雖微覺相同而旗人體態則不能更改卽有竄往他處者亦易于盤詰緝拏已另諭周元理楊景素徐績上緊嚴緝並著楊景素交城

守尉福保將未獲十二人查明花名旗籍年貌知照  
各該省實力查拏一經就獲卽于該處審明正法並  
將其妻子逐出旗籍此皆罪由自取實無可矜憐至  
未經拏獲之人存亡未定若遽令其妻子出旗朕心  
尚覺不忍因降旨另行辦理朕如此體恤實為仁至  
義盡不但此十二人妻子應知感激卽凡我八旗兵  
衆聞之亦當感發天良倍知愧奮共勉為勇銳勁旅  
以存滿洲舊風庶不負朕諄切訓戒之至意

臣等謹按兵丁臨陣退怯法所必誅而潰逃之律尤重德州駐防在逃各兵本屬罪無可逭

皇上申明軍紀

飭令迅緝嚴辦復以未經緝獲之人或有因傷身歿而訪察不能明悉者爰軫

聖慈曲加體恤不遽逐其妻孥法外施

仁不獨身受者應深感泣即聞風者亦當激發天良倍

知愧奮矣



同日舒赫德楊景素奏言臣等于二十七日自臨清往堂邑陽穀壽張一帶于安撫民衆查辦兵丁之暇復細加體訪恐尚有同時死難未經查出之人不可不一例闡揚用彰風化隨經查有壽張縣訓導李昂同伊妻戚氏自縊一事臣等細核情節緣九月初二日逆匪入學署搶劫李昂夫婦即於廂房對縊戚氏當即殞命李昂因繩斷跌地暈絕復蘇該訓導年餘七旬志在必死因賊衆已趨陽

穀經門斗郭有仁勸阻而止維時尚有壽張縣教諭朱麟符被賊槍傷左臂昏暈倒地賊衆謂其已死捨去隨後復甦現已調治漸痊臣等查李昂之妻戚氏年僅三十餘歲當賊衆入署時恐被逼辱與其夫從容就義今李昂已死復蘇而戚氏竟以身殉其志可嘉其情尤為可憫應請交部議予旌表至李昂雖經自縊尚未至死應與受傷已愈之朱麟符均毋庸議奏入

諭部知之

欽定勦捕臨清逆匪紀略卷十五

欽定四庫全書

欽定勦捕臨清逆匪紀略卷十六

丙辰

軍機大臣會同刑部奏言山東逆匪王倫案內所  
有黨惡助逆及被脅同行各犯節經大學士舒赫  
德山東巡撫楊景素陸續解送到京分別嚴鞫均  
已供認不諱臣等伏思螻蟻小民均受

聖朝休養深仁淪肌浹髓我

皇上愛民如子

膏澤渥恩有加無既率土羣黎實無一夫不獲其所乃  
該犯等敢于

光天化日之下潛蓄逆謀糾黨造反核其種種惡孽實  
屬覆載難容除逆首王倫已伏冥誅業經剝骨揚  
灰外王經隆即王聖如為王倫倚任義子首先糾  
合賊黨縱火殺人與王倫同日分頭起事殺官劫  
庫率衆攻城罪大惡極實與首逆無異奸僧梵偉

兇狡濟惡凡王倫肆逆不法之處均由該犯指麾  
調度且敢率衆搶奪王倫砍傷拏賊之侍衛官兵  
孟燦妄稱元帥首預謀逆王樸係王倫親弟妄稱  
王號與王倫終始相隨肆行劫殺其情罪均與王  
經隆相等而吳兆隆身係武生乃敢為賊設計焚  
燒城門實堪切齒雖寸磔不足蔽辜王經隆梵偉  
孟燦王樸吳兆隆均合依謀反大逆律凌遲處死  
閻吉仁吳清林李貴閻吉祥王維全季國貞或稱

副元帥或稱宣行或稱國公或隨侍王倫左右幫  
同殺害官民攻城劫庫或主謀搭橋均屬同惡黨  
逆亦應一例凌遲處死該犯等父母妻子兄弟叔  
姪不限籍之同異均令山東巡撫詳細查拏緣坐  
毋致一人漏網以彰

國憲以快人心仍將凌遲各犯傳首山東于各該處  
分懸并出示遍行曉諭使衆人咸知警戒趙瑤枝  
本是陽穀監犯被賊放出隨同打仗江三跟隨李



旺入夥稱管門將軍帶人把守舊城東門張旺經  
王倫徒弟楊峻德引進在堂邑搬取庫銀並因私  
仇將張德殺害馬德在臨清隨同入夥攻打南門  
李之姚係王倫妹夫隨同攻城殺人徐天一幫搬  
庫銀殺害男婦張雨經王倫義子艾得見引進打  
仗守門趙行跟隨打仗殺人張八縛擡堂邑縣官  
廣標為王倫押護車輛把守溝口稱為知事李國  
泰搬移杉槁紫梯爬城王得朋係王倫僱工趕車

跟隨家屬劉法為賊人頭目隨同打仗張居仁即  
張善長順從入夥代王經隆記帳派為知事官王  
柱係王倫堂兄自幼雙替妄稱為王王有德係王  
柱之子稱為將軍以上十六犯雖起事時均未共  
謀但已隨同賊黨肆惡橫行妄稱名號實屬法無  
可寬應俱擬斬立決以示懲儆楊福被脅隨行邢  
成德被脅逸出復被捆去看船郭廷曾郭廷紀被  
脅跟隨煮飯燒火于秀被脅喂飼馬牛遲王津被

脅行醫均未隨賊打仗應俱發往伊犁給與兵丁  
為奴馬光德借探信為由乘間逃出質訊衆供僉  
同應請

旨釋放被脅之武舉劉陶生員楊榮貴及被脅後隨即  
逃出之陳珮周振樂周振德業蒙

恩旨分別發遣釋放臣等現在遵

旨辦理至張克印係王倫之師張既成妻舅曾學運氣  
袁世珍袁懷禮係張既成之師袁公溥子孫國治

孟王百臣係袁公溥徒弟王心實係王百臣徒弟  
各該犯雖未跟隨王倫反逆但俱係邪教子孫門  
徒不便留于內地亦應發往烏魯木齊給兵丁為  
奴奏入得

旨王經隆梵偉孟燦王樸吳兆隆閻吉仁吳清林李貴  
閻吉祥王維全季國貞著即凌遲處死趙瑤枝江三  
張旺馬德李之姚徐天一張雨趙行張八廣標季國  
泰王得朋劉法張居仁王柱王有德俱著即處斬餘

依議

丁巳

國泰奏言查臨清州土城內及鄉莊被賊擾害之處仰蒙

聖恩賑卹四箇月口糧並給與修房銀兩務使貧民得所經大學士舒赫德撫臣楊景素奏委查辦撫卹事宜臣與道府各員分赴城鄉按戶稽查確實散給賑票隨即動支銀兩倉穀先將十月分賑項按

口給發今于十月二十九日散給完竣實共用過銀二千二百八十兩倉穀六千四百七十三石零民間房屋亦現在修葺棲息有所并籌畫採買耕牛五百隻以資來春耕作俟賑務統行辦竣之日另將實用銀穀總數同戶口數目由撫臣彙核奏報奏入報

聞

已未

周元理奏言據正定縣解到盤獲逃匪鄭克忠楊魁元馬有壯任三四犯臣逐一嚴訊審得鄭克忠等俱係臨清回民賊抵臨清時脅衆從順該犯等即行投入曾經隨賊攻城并搶劫村莊富戶鄭克忠任三又經殺人實係從賊之犯應行斬決即將四犯綁赴市曹斬訖示衆又觀城縣拏獲劉成一犯據東省訊明為賊看車巡營搶糧探信等事業經正法茲據獲到劉成之父劉起奉嚴加訊詰據

劉起奉供伊子劉成素不受教訓八月間出外尋  
工未回不知如何從賊等語查劉起奉不能管教  
伊子任其出外為匪應杖一百發烟瘴充軍奏入  
報

聞

庚申

楊景素奏言據各州縣獲解梵偉之胞兄郭萬冀  
盤佑之父冀景紹吳兆隆之父吳繼宗母于氏吳



兆隆之次子吳士力李忠之妻李馬氏先後到案  
臣覆加親訊均係逆犯的屬伏查梵偉冀盤佑吳  
兆隆李忠係情罪重大之犯家屬應行緣坐所有  
郭萬冀景紹吳繼宗吳士力四犯應請

旨即行斬決吳于氏李馬氏應照例解京給發功臣之  
家為奴奏入報

聞

同日又奏言據泰安營叅將拏獲該營逃兵楊進

安柴進義韓國忠三名訊據供稱隨前任兗州鎮  
臣惟一在臨清塔灣打仗楊進安柴進義先行逃  
走韓國忠隨後跟逃又據夏津縣拏獲撫標左營  
逃兵王奉祥一名據供隨前撫臣徐績在柳林打  
仗隨衆逃走臣隨提至臨清覆訊無異查楊進安  
柴進義二犯首先潰逃法無可貸應請即行正法  
韓國忠王奉祥二犯隨同逃逸應發遣烏嚕木齊  
充當苦差奏入報

聞

同日又奏言查前暫留臨清之青州滿兵六百名山東綠營兵二千餘名經大學士舒赫德會同

奏明俟臣自德州回至臨清時次第撤回今臣於十一月初六日已回至臨清當即面囑副都統伍什布令將青州滿兵六百名于初七八兩日分為二起行走其本省綠營各兵亦分為三起于初七八九等日按隊行走令各歸本營並面諭將備等小

心禁約無令沿途生事至各州縣前獲各匪早令  
解赴臨清現已逐案訊明另行具

奏其應行充發人犯亦已酌量人數多寡配搭起解  
並緣坐眷口委員解部所有應在臨清籌辦事件  
皆漸次完結臣擬于初九日起程赴省清釐一切  
奏入報

聞

同日又奏言臣前奉

諭旨賊衆攻臨清州時所有守禦文武官員兵丁等奮  
勉出力分別陞擢獎賞等因查副將葉信已于革職  
後監斃叅將烏大經已奉

旨陞補臨清州副將署臨清州秦震鈞已奉

旨陞補臨清州知州旋經大學士舒赫德等奏明以知  
州銜管理肥城縣印務在案至濟南城守營千總  
孟大勇前在梁家淺殺賊甚為出力應請遇有守  
備缺出即行題補臣等并查明緹城殺賊兵丁係

紀雲瑞管文平蕭得功秦鎮四名均已遵

旨賞給外委遇有缺出即行拔補其截殺趕車賊人兵  
丁查係楊永泰張興臣郭得滿興發四名又梁家  
淺殺賊之河標官兵查係張武光楊寬張有年孫  
逢清閣紹基等五名俱遵

旨賞給一月錢糧以示鼓勵奏入報

聞

同日又奏言前奉

諭旨王經隆等供出陳合璧招人入教內有石姓褚姓  
現在陳合璧曾否拏獲并查明褚姓石姓二犯等因  
伏查陳合璧一犯前經派員往恩縣查拏尚無踪  
跡其石姓褚姓二犯現經緝獲褚致遠石玉到案  
訊據褚致遠供係恩縣人與臨清王家莊之陳合  
璧認識曾從其學拳念咒八月二十八日隨至張  
四狐莊二十九日伊等往壽張去曾代伊收拾家  
眷後來官兵到莊就逃走了據石玉供係恩縣人

有本縣褚文同陳合璧叫我入道學拳又叫同到張四孤莊去因害怕就回並未跟伊同去等語臣查褚致遠曾到張四孤莊為陳合璧看守家眷實係逆黨法無可寬應請

旨即行斬決石玉雖未從賊同行既經學拳入教未便少為寬縱應請發往極邊烟瘴充軍其未獲陳合璧等現在密飭訪拏俟獲日另結奏入報

聞



同日又奏言據漕臣嘉謨發禁東昌之從賊沈文魁及東昌武定等府續獲逆黨陳起山申天和并在配從賊之徒犯劉十五等先後解到臣親提各犯逐一研訊據陳起山供係濟寧州人在臨清浮橋口被脅從賊曾經打仗殺人申天和係直隸威縣人聽從李忠勾引入教曾至壽張殺人沈文魁供係清平縣人在臨清地方趕驢被賊迫脅用驢馱運麩草並未打仗劉十五供係濱州人曾在青

城縣犯竊充徒臨清被賊裏去攻城不曾殺人後  
來從賊營裏逃回家去就被父親劉國棟出首各  
等供查陳起山申天和二犯俱經打仗殺人法無  
可貸應請

旨即行正法至劉十五一犯堅供並未殺人但係在配  
徒犯從賊日久私自逃回雖經伊父呈首亦未便  
遽從末減應請一併正法沈文魁一犯為賊供役  
應請發極邊烟瘴充軍奏入報

聞

辛酉

上諭內閣曰前因臨清協副將葉信將臨清舊城棄而不守曾降旨將伊革職等因旋經病故今思葉信於賊匪滋擾臨清新城時力疾防守半月有餘尚屬出力其功績亦不忍沒葉信著加恩給還副將職銜

壬戌

楊景素奏言竊查前撫臣徐績奏有臨清州武生

林苞自賊營逃出投首報知賊情一事欽奉

諭旨林苞身係武生非齊民可比豈宜為賊脅從當於  
事竣後通查從賊中脫出之文武生員俱斥革發往  
伊犁以示懲儆等因臣查王倫逆案各犯已經審辦  
完竣除審出從賊之文生楊永貴武生吳兆隆邢  
成德三犯業經訊供解京在案此外並無文武生  
員從賊中脫出之人惟武生林苞應行遵

旨辦理臣隨將該犯傳到審訊據供武生在臨清南門

外永清街住九月初六日聽得賊人要來我將父  
母家口都搬到晁家莊去武生同幾個家人看守  
門戶初七日賊人到了就關門躲避十四日賊人  
找到武生家裏把三個家人殺了放火燒燬并將  
武生綁縛帶到大寺正殿裏圈了一夜次日清晨  
隨著出入的人混出寺外走到東門口賊人盤問  
武生說是同夥的人去搬家眷到了晁家莊因離  
城不遠同著父母家口都搬到戴家灣地方住下

聞得徐巡撫在梁家淺劄營因投到營裏見了巡  
撫就作眼拏賊至平定後纔回家等語臣查林苞  
雖經投出自首赴巡撫營中報信但既身列青衿  
不明大義自難照軍民概從罔治林苞一犯應請  
革去武生發往伊犁以示懲儆奏入報

聞

同日又奏言臣隨同大學士舒赫德前在臨清審  
辦逆賊將王倫王經隆各家屬俱經分別解京正

法并問擬緣坐為奴惟該二犯同族之人未便仍  
令安居故處致使根株不淨應同妻子遷徙烏嚕  
木齊等處以靖地方曾將籌辦情形具奏奉

旨允行臣等當即選派委員分赴王倫居住之壽張縣

党家店王經隆居住之堂邑縣張四孤莊細詢該

二犯親鄰牌甲查開支派名單毋使一名遺漏仍

飭令會同該縣按名緝捕現在陸續訪獲王倫同

族王梁氏等十名口王經隆同族王經常等十三

名口先後解送臨清查內有王柱之妻劉氏及年  
未及歲之伊子王對二名口王柱曾封賊王妻子  
例應緣坐已同緣坐各犯先行管押解京其餘王  
有恒王經常等俱經逐一查詢的係王倫王經隆  
同族未經從賊打仗及封授偽官應請僉同妻子  
遷徙烏嚕木齊等處地方此外尚有王倫族內王  
張氏等二口王經隆族內王郝氏等十一名口俱  
係婦女幼孩未經拏獲男犯應請發回本縣暫行



監禁俟緝到男犯再行遷徙未獲各犯現在嚴密查拏不至漏網奏入報

聞

乙丑

上諭內閣曰東省失察逆匪王倫等邪教聚眾謀為不軌之地方文武各員內藩臬兩司為通省大吏不能先事查察以致逆匪不法滋擾其咎固無可辭但究係統轄之員與該管道府等有間布政使國泰按

察使孫廷槐著加恩從寬革職留任交沂曹道松齡  
兗州府知府福森布濟東泰武道宋文錦東昌府知  
府季世法同知鍾翔鳳前任東昌府知府胡德琳均  
係專管大員王倫於三四月間即有謀逆情形而皆  
漫無覺察實乖職守除胡德琳已於另案革職外松  
齡等均照部議革職仍著該部帶領引見至陽穀縣  
知縣張克紳係守土之官非典史微員可比賊至不  
能保禦城池竟若置身局外當與把總等同罪乃該

部僅擬發邊遠充軍此係前明部臣左袒文員之弊  
斷不可行張克紳著改照守邊將帥失陷城寨律擬  
斬監候以昭平允朕辦理功罪賞罰一秉大公從不  
肯稍存偏倚如遊擊趕福之殺賊陣亡知縣沈齊義  
等之罵賊死節即加以旌揚而張克紳之失城苟免  
亦不能曲為寬貸悉視其人之自取無絲毫成見於  
其中也將此宣諭中外知之

丁卯

上命軍機大臣傳諭楊景素曰臨清舊城房屋經賊焚燬者甚多其大寺則為逆匪王經隆梵偉等所佔自亦不免殘破因憶舊城河西岸有三官廟

皇祖賜額無為觀乾隆三十年朕南巡回鑾曾至其地並賜以御書匾聯又甄門上大玉廟有

皇考御賜安瀾濟運額又東岸漳神廟朕於乾隆二年曾賜以福佑通漕匾額以上各寺廟俱無恙否其大寺又係何名寺內有無

皇祖時所賜匾額現在殿宇是否頽燬並著楊景素即行查明詳晰覆奏

同日軍機大臣奏言河南省押解張百祿一犯到京

上親加鞫訊畢復

命臣等嚴行覆審據該犯供係孟燦之甥又為王倫義子雖王倫起事時該犯並未在東省而其預聞悖逆之言及往河南遂平等處收徒傳教各情均已

認明不諱至王倫自稱夢見得龍將來大貴之語  
據供曾於上年秋間聽見孟燦說過此外並無所  
聞臣等復提未經正法暫留待質之李桐訊問所  
供亦屬相符查張百祿黨逆倡教罪無可逭應請  
交刑部即行凌遲處死李桐一犯亦係王倫義子  
應即一併正法奏入報

聞

辛未

上諭內閣曰山東壽張縣奸民糾眾滋擾一案節經審訊各要犯供詞俱稱逆犯王倫於本年春間即有不軌形跡乃徐績身為巡撫竟爾毫無覺察不能先事查拏致釀事端又不能即時撲滅任其擾害官民致煩京兵勦捕其貽悞封疆之罪本為甚大第念其向來辦事尚屬認真姑准其捕犯自効俟事平再行核辦繼因河南巡撫缺出該省地方緊要一時不得近便熟諳之人是以將徐績用為河南巡撫仍帶革職

留任八年無過方准開復此乃朕格外加恩徐績自應倍加感奮圖報以贖前愆但督撫等遇有革職留任之案雖例不食俸仍得支食養廉今徐績以身獲重譴之人棄瑕錄用若復令坐享豐盈實未足以示罰但竟不支給又恐難資辦公或致藉口需索轉滋流弊著將徐績應得巡撫養廉每年只准賞給五千兩俟八年無過開復後再行全數給予以示懲儆

癸酉



國泰奏言

臣

在臨清審辦逆案人犯完竣經大學

士舒赫德等奏明令

臣

在臨清監放十一月分賑

糧事竣即回省辦事

臣

於十一月初旬率同曹州

府知府李絳等將臨清州城鄉應賑戶口按冊點

放共給過穀六千七百十九石零即由臨清至堂

邑陽穀壽張俱督率印委各官將十一月分賑糧

散給堂邑用穀七百六十五石零陽穀用穀四百

七十五石壽張用穀七十八石零內有原查遺漏

及聞賑還鄉貧民并被賊殺傷營兵家屬臣俱准  
其入冊補賑復率同委官分赴各鄉莊抽查俱無  
遺濫之弊以上四州縣凡屬被擾之家已得過兩  
月賑糧目下足資餬口歲內及來歲正月尚有兩  
個月賑糧臣體察情形不特可以過度寒冬且可  
接至來春東作小民無不感頌

聖恩安居得所一俟明歲春和即將購買牛隻給發耕  
種俾復故業而養元氣奏入報

聞

戊寅

徐績奏言竊照豫省拏獲王倫案內逃匪秦繼銳  
劉甫貴劉克連孫敬四犯經前撫臣何燭護撫臣  
榮柱先後奏

聞在案臣抵任後提取各犯研審其從賊被脅各情節  
俱已供認不諱查秦繼銳同謀入匪攜送賊眷復  
把守城門實屬大逆應照謀反不分首從律凌遲

處死劉甫貴劉克連二犯雖稱被逼從賊但俱持械攻城法無可貸均應擬斬立決以上三犯請

旨即行正法孫敬一犯雖據供被脅暫從即行逃避但身為衙役奉派巡城賊至即行從順逃出又不投首未便輕縱應擬斬監候秋後處決奏入報

聞

十二月乙酉

楊景素奏言臣接准直隸總督周元理咨稱盤獲

山東賊匪王照陸等犯陸續分別斬決發遣外所  
有自行投首之監犯劉奉來軍犯巴彥特古斯委  
員解赴山東就近審訊等因臣即督同司道逐一  
提訊據劉奉來供我是直隸清河縣人在壽張縣  
做買賣乾隆二十八年因染患瘋疾殺人將我收  
禁如今瘋病好了今年八月二十八日賊人進監  
把我鎖鈕打開叫我到城上守垛口我不肯從賊  
就乘空從城上滾下來沿途討乞回到清河投首

據巴彥特古斯供我是察哈爾人因偷羊隻於乾隆三十八年發在臨清當差九月初七日賊人到土城裏把我鎖鐐打開叫我從他我含糊答應俟賊人走開乘間逃跑藏躲了幾日聽得官兵已到油坊就到軍營跪求投首各等語臣查監犯劉奉來不肯甘心從賊滾城逃走即赴原籍地方投首實與

恩旨免罪之例相符察看該犯語言狀貌瘋疾實已痊



愚頑滋擾不法一案奸民敢作不靖自取滅亡原屬不成事體然非簡派八旗勁旅并命大學士舒赫德等前往統率董理豈能未逾月而歲事其間運籌決勝指示機宜及斟酌勸懲之要皆非臣下所能窺及者此事雖不過如內地擒緝巨盜非邊徼用兵成功者可比固無方略之足言而自始及終辦理此案源委不可不詳晰宣示俾衆共曉著交軍機大臣輯成勦捕臨清逆匪紀略一編進呈閱定刊刻頒行至原



任山東學政李中簡前在東省見聞自屬真切亦著  
派為纂修令其隨同編校

臣等謹按王倫以邪教倡惑糾衆陸梁其孽適以  
自斃而綠營恒怯未能迅即殲除仰蒙我

皇上簡發京兵並

遣重臣董率凡制勝機要以及賞功誅罪纖悉俱稟  
睿謨賊既蕩平一切招綏蠲賑

宸慮周詳幽隱畢達初終鉅細無一不見

宵旰之心臣等奉

命緝成紀略一編按日排次據事直書刊布天下俾曉然知所徵信云

同日楊景素奏言臣前准周元理咨拏逆犯張八家屬當令飭屬嚴拏旋據汶上縣將張八之父張倫母王氏妻馬氏幼女存姐拏獲解送到案臣督同司道提犯親訊查張八一犯從賊入教受封并縛擡堂邑縣官情罪重大該犯前由直隸解京嚴

訊業經軍機大臣等問擬斬決奉

旨正法在案今張倫一犯雖堅供並未入教但係黨惡  
重犯張八之父未便輕縱應請發往伊犁等處給  
與種地兵丁為奴其張王氏張馬氏存姐三名口  
均與省釋奏入報

聞

同日又奏言查王倫義兒張百祿之母孟氏即係  
孟燦之姊前經壽張縣獲解經臣等

奏明在臨清監禁俟張百祿定案後再行辦理今張百祿已拏獲解京訊明凌遲處死所有張孟氏一口其子弟皆屬黨逆要犯較之尋常緣坐人等情節尤重應依律即行解京給發功臣之家為奴又據恩縣稟獲李萃之子小燈小鏡郭景順之妻郭何氏等三名口查李萃郭景順前由布政使國泰審擬該二犯既係邪教之首復有應賊之謀雖已監斃仍應斲棺戮屍並將其妻子緣坐等因

奏准在案今李小燈等三名口應同張孟氏一併解  
交刑部照例辦理奏入報

聞

乙未

上諭內閣曰楊景素奏訊據續獲從賊之臨清民胡十  
即胡紀成供稱賊夥逼令找寬大房屋即同往伊總  
麻族叔監生胡師抃家賊人逼胡師抃降順復經胡  
十勸從胡師抃向說祖上做官世受國恩不肯從賊

遂同伊妻縊死除胡十即胡紀成即行斬決外請將  
胡師抃夫婦勅部議卹等語監生胡師抃被賊逼脅  
并伊姪勸從乃能念係仕宦子孫不肯失身從賊同  
妻矢志捐軀其情實可嘉憫胡師抃及伊妻劉氏均  
著交部照例議卹胡十即胡紀成著即處斬該部知道  
臣等謹按彰善癉惡之用所以維風教而正人  
心監生胡師抃以先世曾經仕宦顧惜名義當  
賊人迫脅之時不負

國恩夫婦從容殉節仰荷

綸言嘉憫

卹典優施其從賊之胡紀成卽予顯戮褻誅皆由其自

取

聖主刑賞之大公不更彰明較著乎

庚子

軍機大臣奏言臣等前奉

諭旨如歸太一犯未卽弋獲著于封卬前將李旺亦行

正法今已屆封印之期擬即于本日交刑部將該犯押赴市曹凌遲處死奏入報

聞

同日楊景素奏言臣於十一月二十二日欽奉

諭旨臨清舊城內三官廟大王廟漳神廟大寺等處有

無顏毀等因臣隨飭委泰安府知府朱純孝前往敬

謹查看嗣據該府稟稱遵即親赴各寺廟逐一細

查並敬謹閱看各處



御筆匾聯查得河西岸三官廟大門一座門上石刻

聖祖仁皇帝御賜無為觀額現在完整門內原有大殿三間及後殿上下兩層共十間

皇上欽賜福祐津途匾額並

御書雙牀節宣資利濟三元調燮協寧居對聯向在大殿內懸挂今大殿及後殿等處均已被燬又甄闡上大王廟惟對河戲樓已燬其餘殿宇門牆均未損壞正殿內有

世宗憲皇帝御賜安瀾濟運匾額現亦完好又磚闌東岸  
漳神廟正殿內向有

皇上御書福祐通漕匾額今正殿配殿及後殿三間并  
牌樓戲樓等處盡皆燒燬至大寺本名大寧寺係  
前明所建並未經

賜有匾額其殿宇連山門查係五進前四進及配殿鐘  
鼓樓等處俱已燬廢惟最後五間尚存亦極殘損  
再查三官廟迤南

座落一所中有

御詩碑亭週圍房屋牆垣俱未損壞惟門牕榻扇無存  
等語臣伏查臨清舊城一帶濱臨運河向來衡宇  
櫛比士商輻輳且係歷次

巡幸經由之地其各處寺廟規模整肅

宸翰輝煌運道民生永資利賴迺自賊匪等佔據以來  
梵宇琳宮半遭殘破雖神人共憤逆匪已伏駢誅  
而覩茲頽毀情形不即請加修理司土之官實切

疚心現在該處復業民人補葺舍宇皆官為給費  
次第繕完所有三官廟等處自亦宜亟事興修用  
昭舊制臣與司道等悉心酌議擬就三官廟漳神  
廟兩處殿宇廢基及大王廟之戲樓原址或仍前  
修整或稍易舊規其未經被燬房屋亦量加裝飾  
俱照前塑設神像並敬將三官廟原

賜匾聯重行鈎勒懸挂其漳神廟匾額

墨寶前已呈繳應俟工竣後奏請

發下一併鈎摹安設以昭誠謹再大寺前四進房屋共  
計二十六間燒燬無存查非

國朝

敕建寺宇向無

欽賜匾聯亦非逼近河岸為往來瞻仰之地原屬前明  
居民所建地基廣濶逢集擺攤賣貨無庸即行重  
建奏入報

聞

乾隆四十年春正月庚戌

楊景素奏言據壽張縣知縣黃鈐拏獲逆匪案內  
軻見一犯稟解到省臣嚴加審訊據軻見供我原  
籍湖北武昌府人祖父軻百吉犯罪流在壽張縣  
我是在壽張生長的正月初三日被賊迫脅趕車  
同到陽穀堂邑柳林等處賊人給了一根白蠟杆  
子一塊藍布包頭叫我跟在後邊打仗初九日賊  
人在河裏搭橋我也扛過杉木第二日扛著秫秸

去燒南門二十三日官兵到了我從塔灣地方逃走回到陽穀壽張交界地方被拏等語臣伏查軻見一犯從賊日久屢次打仗搭橋燒城實屬罪無可逭應請

旨即行斬決奏入報

聞

二月癸未

上諭內閣曰張成章趙雲章王世揆張驢兒四犯先從

張百祿學拳繼知王倫謀逆情事不即首告實有應  
得之罪又張百祿之胞兄張存良即張百儉張二羣  
即張二小按律緣坐亦不為枉但張成章等究未隨  
同助逆即張百祿之罪較之濟惡之王經隆等亦稍  
有間其親屬尚可不必同科張成章趙雲章王世揆  
張驢兒張存良即張百儉張二羣即張二小均著從  
寬免死發往伊犁給種地兵丁為奴

甲申



楊景素奏言據臨清州同王右銘拏獲姜二小  
一名稟解到省臣以姜二小係奉

旨查拏有名之犯須親提確訊方能定其虛實因即嚴  
加審訊據姜二小供係臨清州人上年九月初六  
日在三合莊討乞過見賊人逼令順從并給了一  
把刀初七日在臨清州殺過一個人又有一人被  
賊人槍戳倒了我還砍了一刀就同賊人去攻西  
門城上鎗砲利害就跑散了二十三日官兵到來

我乘著大霧逃走的等語臣查姜二小一犯曾經從賊殺人攻城亦屬罪無可逭應擬斬立決請

旨即行正法奏入

諭曰彼已殺二人即正法亦不枉也

同日又奏言竊照逆賊王倫案內情罪重大之犯所有家屬人等律應查明緣坐茲查有逆犯吳兆隆之長子吳士元及吳士元之妻石氏二名口擊獲解省臣親提嚴訊據吳士元供我是臨清小市

莊人父親吳兆隆係武生母親陳氏生我兄弟三人我居長第二吳士偉第三吳士力我母親已死繼母李氏生子五兒我因繼母不容時常出外做活就贅在邱縣石家做女婿去年九月間聞說王倫攻打臨清我不敢回家並不知父親從賊的事吳石氏供亦相同臣伏查吳兆隆一犯身係武生為賊設計燒城情罪重大業經奉

旨凌遲處決其家屬律應緣坐今吳士元係伊親子應

請

旨即行斬決吳石氏應給發功臣之家為奴再查吳兆隆之父吳繼宗母吳于氏及伊第三子吳士力幼子五兒俱經拏獲問擬緣坐分別辦理惟吳士偉一犯查據已被官兵殺死合并奏明奏入報

聞

同日又奏言臣節據河臣姚立德咨解逆案内丁寬郭三并劉存義劉存誠劉學文五犯到省臣逐

一嚴訊據劉存義劉學文二犯供認從賊入教殺人攻城屬實應即行斬決丁寬係王倫之義子丁若金胞姪劉存成係劉存義胞兄均應發往伊犁給種地兵丁為奴郭三一犯被脅隨行為賊供役應請發極邊烟瘴充軍奏入報

聞

丁亥

楊景素奏言據壽張縣訪獲劉煥之妻王氏解省

臣親加研訊據劉王氏供我係壽張縣壯役劉煥之妻我從前因害心疼病求党家店之王倫醫治後來病好丈夫劉煥就入了他的教學運氣不吃飯時常在王維全家裏說話八月二十六日劉煥出門去了不曾回來二十八日夜裏賊人進城天未明的時節劉煥慌忙回來叫關上門拉著我說我幫著他們殺了縣官劫了庫這事做得大了官兵必來勦殺我只好往遠處躲幾時也顧不得你

了到了天明他就走了我隨被賊人裹到臨清後  
來大兵到了我與衆女人各自逃命並沒有見過  
王倫等語查劉煥身充縣役開城擡官罪大惡極  
伊妻劉王氏一犯應照律緣坐解京給發功臣之  
家為奴奏入報

聞

癸卯

楊景素奏言據濟寧州拏獲王倫案內餘匪陳學

再陳功二犯解省臣遂加嚴訊陳學再供同父陳楷從賊復經打仗殺人陳功供被賊脅從供役各等語陳學再應即行斬決陳功應發往極邊烟瘴充軍再查陳楷一犯據陳學再供稱已被官兵殺死合併奏明奏入報

聞

三月丁卯

軍機大臣奏言據山東巡撫楊景素奏勦除逆匪



案內動用各項銀兩分別核辦歸款又據布政使國泰奏此次軍需動用費至七萬餘兩在撫藩均難辭咎情愿分賠銀三萬兩於每年養廉內照例扣抵清款等因奉

旨交<sup>臣</sup>等議奏<sup>臣</sup>等伏查內地奸民滋擾發兵勦除本與擒捕盜賊無異其一切用費原非軍需可比該撫藩臬為通省大員既不能早為覺察先事捕除及至事起倉卒一切所需復經理無緒以致重複

支給用少備多種種浮費皆由徐績等辦理不善

所致前經

臣

舒赫德據呈奏請軍需費用徐績情

愿盡出家貲歸還帑項今據該撫楊景素將動用

各款據實開報

臣

等逐加查核內除存餘米麩豆

草及堪以變價之物並例應核扣各款俱應如該

撫所奏准其分別變價歸款照例扣還其多餘備

辦及各營遺失軍械并臨清守城拆取擊賊磚塊

應行著賠者共計銀七萬一兩八錢二分九釐若

如該撫楊景素所奏令徐績一人獨賠未免為數太多轉致完繳無期若如國泰奏請分賠銀三萬兩臬司獨令置身局外亦未為平允臣等酌議應均分兩股令徐績分賠一股銀三萬五千兩零其餘一股藩司國泰係總理錢糧事務應分賠十成之六銀二萬一千兩零按察使孫廷槐有稽查奸匪之責亦應分賠十成之四銀一萬四千兩零各令其按數照例賠繳以清款項至借給官兵鹽菜

口糧一案共計支過銀一萬六百七十三兩零現  
在亦經該撫奏明著落前任巡撫徐績藩司國泰  
及辦理行文之戶部堂官名下三股分賠至德州  
駐防兵丁支給過鹽菜口糧共銀四百三十七兩  
零應於各兵丁名下分別扣追報部充公均應如  
該撫所奏辦理奏入

上從之

四月辛巳

上諭內閣曰本日召見山東臨清協副將烏大經詢問該員上年勦賊情形據稱隨烏大經打仗把總仙鶴林陳象坤俱屬奮勇出力仙鶴林已經拔補千總陳象坤尚未陞用等語此等奮勇弁員較之尋常在營之人加倍出力凡遇缺出日應先儘拔補以示獎勵著諭楊景素將陳象坤遇有千總缺出即行陞補上又諭內閣曰山東臨清協副將烏大經著加恩賞戴花翎並賞給緞二疋

戊子

楊景素奏言據陽穀縣訪獲王有成訊係王倫族  
姪向在東阿縣伊妻王氏家居住將王氏一併拏  
解到省臣以王倫五服內親屬應行遷徙人等前  
經訪明開單具

奏並無有成之名彼時何以獨將該犯遺漏恐係族  
鄰等有心隱匿因即親加研訊據王有成供我是  
党家店人父親王楷與王倫是同高祖兄弟我從

十六歲上就入贅在東阿縣丈人王居家裡丈人就把我作為繼子頂他家業故此總在東阿縣居住從不回党家店去宗圖上就不載我的名字我平日並不知王倫做的事情等語臣伏查王有成久經贅居外縣亦不知王倫謀逆情事但既訊係王楷親子即在應行遷徙之例應照原

奏將王有成及妻王氏遷徙烏魯木齊地方安置以絕逆匪根株再查王有成之父王楷因知王倫謀

逆不首已在臨清正法其餘家屬均經照例辦理  
奏入報

聞

甲辰

軍機大臣會同刑部奏言所有逆匪王倫案内奉  
旨查拏各要犯經山東巡撫楊景素先後拏獲解京之  
常老輝等十二犯嚴加鞫訊該犯等或打仗攻城  
或從賊役使均已審明屬實分別定擬斬決發遣



具奏奏入得

旨常老輝蕭利王六李振李之貴劉三徐士姚俱著即處斬餘依議

五月甲寅

上諭內閣曰據楊景素奏東省勦平逆匪案內所有陣亡傷亡兵丁蒙恩卹賞者共六十八名除子弟現已成丁准其入伍食糧外尚有五十三名家屬現皆養贍無資懇恩酌籌優卹等語此項兵丁究係奮勇効

命其眷屬或老幼無依難以自圖存活情亦可憫著  
加恩於建曠項下酌給守餉半分以示矜恤

已已

上命軍機大臣傳諭楊景素曰今日召見前署臨清州  
知州秦震鈞及現任知州李濤詢以地方情形看其  
奏對光景李濤較為明白而秦震鈞僅係誠實人但  
該員於逆匪圍攻臨清時隨同烏大經等督率兵夫  
上城晝夜守禦頗為出力其勞亦不可沒著傳諭楊

景素遇有該省簡缺知州缺出即以秦震鈞題補

乾隆四十一年丙申春二月

上以兩金川全境蕩平大功告蒞爰諏吉啟

鑾

巡幸山東告功

闕里禮成

御舟由水程旋蹕四月丁未

親莅臨清舊城

咨詢周覽

諭內閣曰臨清舊城當水陸要衝向來商賈駢集塵市  
殷闐民居亦極稠密前年逆匪王倫等竄踞其地搶  
掠焚毀人多蕩析離居朕心每深軫念雖曾加恩撫  
恤冀得安全尚未能信其是否均霑實惠茲蹕路經  
行親臨周閱見商民廬舍修葺者已十之八九閭閻  
環聚貨肆列陳風氣漸可復舊甚為慰懷因念勦捕  
逆匪時救發勁旅遠行始得迅速歲事而所調駐防

及綠營兵衆亦頗不少然係內地捕賊非征調用兵可比一切應需日用各有本分糧餉可以抵支乃徐績等過涉張皇妄照軍需之例支放實屬錯誤因責令分賠以示懲儆但念此項為數稍多且因地方公務動用尚非伊等冒銷冒領自未便全令賠還因交楊景素查明徐績等已未完細數開單呈覽內除徐績身任封疆辦理不善致地方有逆匪倡亂之事本應治罪業已加恩寬宥所有伊名下應賠之數自應

罰令全賠其藩司國泰名下尚未完銀一萬三千兩  
零原任臬司孫廷槐名下尚未完銀一萬兩零並著  
加恩免其分賠准予開銷再朕今日在舊城親臨閱  
看逆賊等佔據之汪姓大宅及大寺兩處詢及官兵  
勦捕情形彼時叅將武靈阿剛塔俱係在事出力之  
人雖已加恩擢用仍著賞戴花翎示獎又賊匪前此  
攻犯臨清新城計七八日經副將葉信叅將烏大經  
署知州秦震鈞晝夜設法拒守殺賊保城均屬可嘉

今烏大經已擢授總兵葉信於病故後仍給還副將  
原銜至秦震均雖以知州陞用但至今尚未得實缺  
著賞緞二疋以旌其勞並著該省缺出即用又回兵  
洪印率領回民勦殺賊匪頗為奮勉著加恩交該撫  
即以把總拔補俾衆共加鼓勵又據楊景素奏稱前  
年在臨清河西帶兵時有臨清州民王或每日清晨  
煮粥數石送至河岸供饋衆兵朝餐旬餘不懈等語  
王或以里巷小民能知大義深可嘉尚著加恩賞給

七品頂帶並賞緞二疋用示獎勸朕賞罰功過惟視  
其人之自取權衡悉協於平以昭彰瘴將此諭衆知  
之

臣等謹按臨清舊城素稱蕃富遭逆匪焚掠蕩  
析幾空蒙我

皇上俯軫民艱節經降

旨撫卹湛闔均霑復以金川大功告成

臨幸山左



翠華所至見閭閻殷盛之象已復舊觀列闔通闕懽迎  
蹕路因之

綸綍頻申於守土文武官員或獎其勤勞或賞其過誤  
以至拔奮勇之回兵賚急公之氓庶賞勸激揚  
隨

車布澤非徒

入疆行慶而已

是日

上詣三官廟漳神廟大王廟

閱視新建殿宇

親致辦香

賜漳神廟額曰澄波利運並

命錄

御製臨清歎臨清歌二詩勒石於臨清閘東岸以傳示

久遠

御製臨清歎

臨清傍運河富庶甲齊郡一旦遭賊燹遂致不可問

白蓮教始徐鴻儒百餘年未盡根株王倫倡亂壽張

縣逆黨蟻聚起一呼蔓延三縣受其害賊吏劫庫毆

無辜遂據臨清作巢穴三犯新城未遂謀

叶賊據臨清舊城

為巢穴幾半月餘三次犯臨清新城城中文武守禦極嚴賊甚眾賊不得逞爰發京兵速

勦滅重臣經事資嘉謨

山東綠營兵儒怯無用知其未能勦賊特簡健銳火器營

兵一千令額駙拉旺多爾濟等帶往又掄東三省善射五十人馳赴之並遣大學士舒赫德先期往董軍務京兵甫至臨清賊已有聞風奔竄者經春寧音濟圖邀擊盡殲之八旗勁旅固勇銳無前亦深藉舒赫

德調度  
之力

四面會合同日進遊魂釜底奚逃誅而何逆

賊竟抗拒無已火攻下策圖

舒赫德由德州進兵攻其東北徐績自東昌一

路進兵攻其東南慮徐績不習兵別遣阿思哈率京兵二百往會之周元理遣直隸總兵副將領兵攻其西北何燭遣河南總兵攻其西南逆賊四面受圍伏匿舊城不敢出而其地街巷狹隘屋宇稠密官兵難以施展舒赫德不得已因用火攻之策 既翦羽翼彼力盡翻自舉火燔

其軀藏事迅惟經六日

自圍攻舊城以後每日俱有新獲賊黨以次臧殮要犯悉

就擒惟首犯王倫自揣罪重在樓縱火自焚按驗得實蓋進兵凡六日而事藏使非京兵之力安能神速 若趙彥廿載何延紆

明季徐鴻儒倡白蓮教擾山東前後凡二十年始經巡撫趙彥

討平賊蹂躪官軍攻富庶之地焦土空賑蠲招集勅

大吏午夜猶痛愚民窮玉石俱焚固爾自取舊城居民亦有

被脅從賊者先期諭令投歸即免罪乃招之不出兵至豈能復分殺戮過多固所不忍然由若輩自取亦

無可如何耳雖然吾惟引咎責吾躬

### 御製臨清歌

御舟經臨清因作臨清歌邇曾金川擬淮蔡勦剷奚

數上聲斯么麼兩金川以服屬王司敢於負恩抗拒剷除本非奇績是以近作告成太學碑文

比之唐時討平淮蔡而已若王倫係內地奸民以邪教惑民作亂發兵勦滅不過如尋常擒捕盜賊更不

足比數也獨惜閭閻遭燹亂誠有劫數難容過

逆匪倡立邪教以避

劫數為詞煽惑愚眾良民為賊戕害及逆黨就職伏誅者幾以萬計是則此一方之劫而非若逆匪所云

也賑災無待主爵尉飢困原異潢池戈

王倫滋擾時或有言災民

因飢餓所迫而亂者給事中李淑芳至形之章奏恐地方官果有其事因命大學士舒赫德於督兵之便細加訪察乃據實奏聞以壽張堂邑陽穀等縣是年收成俱稔賊所至並未搶劫倉穀其非飢民可知王倫等實因邪教糾眾不法無識喜事之徒妄言惑聽固不足信耳

縣令失察更未密

一死稍得贖愆差

壽張令沈齊義於王倫等倡立邪教未能早為察知擒治及聞其事

乃於大堂僉差往捕而胥役入教者多遂至漏洩生變機事不密自貽之感使其尚在常律以不職失城

之罪因已罵賊遇害特宥其過而仍予之卹

然猶賜卹寧從厚謂烈則可

忠則那

沈齊義偵轅失城為賊所害止可謂之烈而不得謂之忠其女二姑於其父喪歸籍時投

繯以殉亦止可謂之死義而不得謂之孝蓋聖人教民無以死傷生毀不滅性未聞教子女以殉父母為孝也昨浙撫三寶請旌章中乃謂忠孝聚於一家措詞失實矣因降旨宣諭勅却以全家殉難例旌之

突如其來據要地新城終未失嵯峨

賊匪佔據臨清舊城復遣其黨

於初七至十三連日攻犯新城之西南二門副將葉信參將烏大經署知州秦震鈞嬰城固守百計抵禦發鎗殿殲賊甚多賊不得逞十九日賊復以火藥實車擁至欲焚燬圍扉城上偵知之擲石礙其車輪以火箭射其車藥燃賊反自焚斃多人自是不敢復窺新城矣

禮不下庶避則可頗

有明理者弗磨文武諸吏及士庶盡節弗屈原堪嘉  
莠民翦滅示國法良民旌卹恩加宜叶綠旗怯懦豈

足恃八旗選銳無須多

因綠旗兵怯懦無能特選派健銳火器兩營滿洲兵一千

名馳赴山東勦捕賊衆即就翦滅至逆匪初起侵擾諸縣時官民為賊所害者文職除沈齊義外則有署堂邑知縣陳枝及其弟武舉陳元標陽穀縣丞劉希憲典史方光祀及其侄方義堂邑訓導吳琛及其姪吳文秀僕王忠武職則有署壽張遊擊趙福莘縣把總楊兆立堂邑把總楊兆相襄城外委把總崔吉士又普洱總兵薩靈阿之妻時旣居臨清亦罵賊被殺壽張訓導李昂妻戚氏聞賊至自經其士民則壽張生員王鳴岡武生王廷柱臨清生員王政臨清州民黑耿光馬體恭馬體乾皆為賊害臨清生員李日孜



監生胡師朴及妻劉氏州民趙金階皆自經死並勅部如例旌卹

### 重臣習事命經理

### 夾河佈置為周遮

巡撫徐績等皆非練習軍務之人措置不能得要以大學士舒赫德

曾經西師之役嫻於用兵即命至山東督率調度進勦並命額駙拉旺多爾濟都御史阿思哈同行舒赫德至德州調集各處兵馬京兵一到即令阿思哈分領眾兵往會徐績等至臨清由南路進攻舒赫德拉旺多爾濟等統領京兵由東面進攻復派侍衛春寧率東三省善射手五十人亦至並命直隸總督周元理統兵由故城一路協勦并於威縣平鄉分兵堵禦河南巡撫何焜在邱縣館陶一路統兵防守楊景素時為直隸布政使駐兵河西因以拆橋事委之廿二日夜半楊景素瑪爾清阿率兵攻賊浮橋射殪燧礮之賊兵丁穆維踴上賊舟奪礮斷橋索勁兵數十人繼之擲炬焚橋艦頃刻而殫殲賊數百賊遂不得西

逸廿三日京兵全至臨清於舊城四面環困賊窟迫  
率一二十人至塔灣復經春寧音濟圍等射殪五六  
百逆匪等復迴回舊城其餘鼠逸之賊追殺殆盡賊  
有潛回欲渡河西者悉為楊景素一路之兵射擊無  
遺越數日賊即勒平錄其功績因擢楊景素為山東  
巡撫瑪爾清阿為兗州總兵穆維賞巴圖魯號擢千  
總並賞藍翎其在事出力大  
滋事一月平六日王倫  
小員弁各錄叙陞賞有差自八

月廿八日起事至九月廿九日渠魁自焚黨羽悉就  
擒獲檻解誅磔統計僅一月而八旗兵合勦自九月  
廿四至廿九計凡六日而平以視明白蓮教徐鴻儒  
等擾亂山東二十年始經巡撫趙彥討平其遲速不  
啻數百倍  
趙彥廿載誠延俄策馬歷歷情形閱萬姓安堵

迎肩摩徒觀鋪戶復如昔是因三倍商賈羅臨清舊城為商

賈聚集之所市廛密比賊殘  
破後近已修整漸復舊觀

汪家大宅付灰燼首逆

以此為巢窟此或居官欠良報其後有識思早加

王倫

至臨清佔居原任湖南巡撫汪灝舊宅其曾孫汪繼  
烈等豫挈家徙避官兵至賊放火自焚意汪灝為巡  
撫時必有歛賄自肥之事故其居不能遺之曾元世  
守然使汪繼烈若明於大義當避賊外出時先焚其  
室令賊無所棲事後上聞必嘉憫厚賜而錄用之茲  
雖無從賊之罪而室成灰燼賞亦無可施惜乎其智  
不及此也

率亦置之弗深咎大義詎必常人訶舟經因作  
臨清歌奚以致此慚如何

臣等謹按我

國家子愛黎元涵濡覆育浹於人者至深且久

皇上勤求民隱閭閻疾苦每廛

旰宵或未雨咨詢或臨時撫卹

深仁厚澤普被寰區凡飲和食德之儔仰沐

恩膏方感切生成之不暇乃王倫惑衆倡亂擾害地方

實非事理所應有良由賊匪等罪惡稔重自取

誅鋤一經

命旅勦捕立時迅滅凶渠焚斃逆黨駢誅事訖於三旬

而亂平於六日速綏定之餘小民甫脫兵燹即  
登衽席勞來振貸

愷澤頻頒而

聖主除暴安良之盛心如雷霆雨露之並施矣伏讀  
御製臨清歎臨清歌始則午夜

軫念夫困窮繼則


清蹕周循夫安堵痼瘼求瘼之誠溢於言表臣等奉

旨纂輯紀略敬以

御製詩二章錄載於此為全編鍵束俾天下萬世讀紀

略而臨清之原委瞭然且恭誦

宸章而紀略之本末益曉然矣



欽定勦捕臨清逆匪紀略卷十六